

Hamaika berrikuntza Korrika 11n

Inoiz baino luzeagoa izango da aurten, eta 500.000 korrikalari baino gehiago espero ditu AEK-k



MARISOL RAMIREZ

AEK eta Korrika 11ren arduradunak, aurtengoa aurkezteko atzo Bilbon eskaini zuten prentsaurrekoan.

Gorane Agirre / Bilbo

Korrika 11 martxoaren 19an hasiko da, Iruñean, eta gau eta egun Euskal Herri osoa zeharkatu ostean, martxoaren 28an amaituko da, Donostian. Inoiz baino kilometro gehiago izango ditu hamaikagarren Korrikak, eta hamaika berrikuntza ekarriko du.

MARTXOAREN 19a jaieguna dela eta, iluntzean hasi beharrean eguerdi partean abiatuko da Korrika; beraz, ordu batzuk lehenago. Horri esker, inoiz baino kilometro gehiago izango ditu aurten: 2.259 kilometro, alegia. Ibilbidean 500.000 korrikalari baino gehiago espero ditu AEK-k.

Hamaikagarren Korrika *Bat eta bat hamaika, zu eta ni euskaraz* lelopean egingo da. Xabier Irazusta Korrika 11ren arduradunak azaldu zuenez, «bat eta bat hamaika direlako; hau da, gutako bakoitzaren konpromisoarekin, ekarpen bat eta beste bat batuz eta auzolanari ekinenez, hamaika gauza lortu dezakegula».

«Hamaika zenbaki berezia da euskaldunontzat», nabarmendu zuen. «Izan ere, asko izan dira orain arte euskararen berreskurapenean egindako urratsak, eta zeregin horretan hamaika lagun ari-tu da nor bere hondar aletxo-

jarriz, eguneroko lan isilean, bakoitza bere esparruan, baina auzolanean ere bai askotan. Eta gerora ere, hamaika erronkari aurre egin behar izango dio euskarak, hamaika lan geratzen baitzaigu egiteke euskarak dagokion lekua erdietsi arte. Baina euskara berreskuratu nahi duen gehiengo horren konpromisoari esker, lortuko dugulako ziurtasun osoa daukagu. Nork bere ekarpena eginez, hamaikatxo lan burutu daitekeelako».

Korrikak euskararen aldeko jardunean nabarmendu den norbait omendu du beti. Orain, oster, 11 lagun omenduko ditu, euskara

berreskuratzeko prozesuari ekarpen garrantzitsua egin dakoak denak. Goi-goian eutsi dioten euskararen lekukoa belaunaldi berriei pasatzeaz gain, euskararen aldeko lasterketan jarrai dezatela eskatuko diete omenduei.

Bestalde, bi urterik behin egiten den Korrika beti izan da kontzientziazte kanpaina erraldoia, bai eta AEK-k egiten duen lanean aurrera jarraitzeko beharrezkoak diren bitarteko ekonomikoak eskuratzeko bidea ere. Baina orain Korrikak beste ekarpen bat egin nahi dio euskara berreskuratzeko prozesuari; horretarako,

Korrikan parte hartzen dutenei euskararen aldeko konpromiso jakin bat har dezaten proposatuko diete.

Era berean, aurrekoetan bezala, korrikaldia baino lehen Korrika Kulturala izeneko egitarau kulturala izango da otsailaren 13tik aurrera. Hilabete osoa iraungo du, aurrekoak baino zabalagoa izango da, eta mota guztietako kultur ekitaldiak bilduko ditu.

Aurtengo beste berrikuntza bat Korrika garaian izango da; izan ere, Korrikak irauten duen bitartean, egunero arlo bat aukeratuko dute (literatura, irakaskuntza, kirola, enpresa mundua...).

Konpromisoa mugarri

KONPROMISOA da Korrika honen mugarrietako bat, eta horren pizgarri izango da hamaikagarren ekitaldiko berrikuntzarik garrantzitsuenetako bat. Kilometroa erositzen eta lekukoa eramanez Korrikan parte hartzen duten guztiei euskararen aldeko konpromisoa jakin har dezaten proposatuko die AEK-k.

Xabier Irazusta

Korrika 11ren arduradunak honela azaldu zuen: «Ez gara konpromiso orokor edo teorikoaz ari; euskararen alde neurri jakin bat har dezaten proposatuko diegu Korrikan parte hartzen duten guztiei».

Neurri hori gutiz borondatezkoa izateaz gain, norberak aukeratuko du zein konpromiso hartzen duen: esate baterako, batek seme-ala-

bak euskal eredu-tan matrikulatzeko konpromisoa hartuko du; beste batek, euskaltegian izena ematekoa; dendari batek prezioak euskaraz ere jartzeko konpromisoa har dezake, edo enpresa batek publizitatearen zati bat euskaraz egitekoa.

AEK-k hainbat neurri proposatuko baditu ere, bakoitzak aukeratuko du zein aukeratuko

duen, bai eta horrelakorik egin nahi duen ere. Dena dela, AEK aurrera-pausoa dakarten neurri guztiak onartuko ditu. «Handiak zein txikiak, konpromiso ausartak eta xumeak: denok, bakoitza bere borondate eta posibilitateen arabera, euskararen alde zerbait egin beharraz gizartea osoa ohartaraziz joatea baita gure asmoa».

omenduak

Hamaika omendu

Hainbat alorretan euskararen alde aritu direnak hamaika izan direla, eta etorkizunean ere euskarak aurrera egingo badu hala izan beharko duela eta, Korrikak 11 lagun aukeratu ditu aurten omentzeko.

Pedro Miguel Etxenike •

Euskara zientziaren eta goi mailako ikerketen arloan bultzatzeko egin duen lanagatik.

Jose Ramon Etxebarria •

Unibertsitate gaiak euskaraz lantzeko orduan aitzindaria izan delako.

Jose Angel Iribar •

Kirolari eredugarria izateaz gain, euskara kirol munduan txertatzen etengabe saiatu delako.

Maitena Araguas •

AEK-ko irakasle euskaldun berria izanik, herri honetan jende askok egin duen ibilbidearen adibide delako. AEKn ikasi zuen erabat euskaldundu arte, eta gaur euskara irakastera ere heldu da.

Etxepe •

Elgoibarko enpresa hau lan harremanak euskalduntzeko orduan aitzindaria izan delako.

Mendia Optika •

Euskara zerbitzuen sektoreran eraman duelako.

Laudioko ikastolaren

sortzaileak • Milagros Etchezarraga, Maria Jesus Legarreta eta Maite Larizgoitia; bide batez, garairik beltzenean ikastolen inguruan egindako lan eskerga gogoratu eta eskertu nahi dute.

Argiñe Iturregi •

Sestaoko Kueto eskolaren sortzaile eta irakaslea. Eskola publikotik eta Sestaoko inguru erdaldunetan lan oparoa egin duelako.

Euskalerria Irratia •

Oztopo guztiak gaindituz, Iruñerriko irratiak euskaraz emititzen segitzen duelako.

Arantzaz herria •

Euskaraz bizitzeko erabakia hartu duten herri guztien ordezkari gisa.

Maiatz kolektiboa •

Euskal literaturaren arloari berrikuntza eta freskotasuna ekarri diolako.